

LOKE PUEBLO KIER O MESTER SA

pa: Lord Cobashi- CRITICA CONSTRUCTIVO

Bon dia mi pueblo stima di Aruba. Ami a yega di traha personalmente cu Gobernador y mi sa cu el a yega hopi leu.

Hopi hende ta puntrando, dicon e hendenan grandi cu nan nomber den tantu escandalo no por wordu gara, o ni sikiera bai dilanti di Juez?

Hopi hende ta haya, si enberdad segun corant, sr.Vrolijk a pidi dispensa o e a rectifica, e por wordu pordona. Ta pa esey hende mester sa nan ley y mester tin cuidao kico bo ta papia o skirbi, pasobra bo por hayabo den masha hopi den masha hopi problema.

Mi ta spera, cu sr.Juez lo tin misericordia riba sr.Vrolijk y pordoné. E unico cos cu nos tur ta spera, cu den futuro lo tin LEY PA UN, LEY PA TUR, incluyendo e grandinan tambe, pasobra mayoria parti, e grandinan si ta scapa. Esey si no ta hustu. Pueblo semper corda esaki bon, nos mester respeta ley, o cana tras di e ley, si bo no kier hayabo den problema.

Mi a biaha na St.Maarten siman pasa diadomingo pura, pura, pa waak mi ruman muher, cu ta arubiana, trahando na St.Maarten 17 aña largu, como Inmigración. El a wordu gedald door di un chofer loco o irresponsabel y el a hera muri. E tabata den un coma, pa casi 24 ora cu un hersus schudding, pero nos bon Señor Hesu Cristo a scapé. Mi kier agradeci Dios primeramente, cu el a salba mi ruman muher, tambe mi kier bisa danki na henter e medical staff di St.Maarten Medical Center, esaki ta e hospital, tur mi famiyanan, amigu y amiganan cu a reza p'e, aki na Aruba y St.Maarten, tambe pa un di su miho amiganan Louisa York, cu a keda na su lado, te ora di salida di vliegveld pa Aruba. Por ultimo, Dr.Gumbs cu a zorg p'e, masha bon mes. Si mi no ta equivoca, Dr.Gumbs ta arubiano, e ta Hoofd of Director di gezondheidsdienst na St.Maarten.

Otro cos cu nos mester ta orguyoso di dje. Danki tambe na Sr.Charles o Charlo Groeneveldt, doño di Grand Case Beach Motel y otro Apartamentunan na St.Peters, Sr.Charles York di lands Financien y mi gran amigu Samuel Woodley, cu a yudami move na e diferente lugarnan, pami bin cla, pa bula pa Aruba siman pasa diasabra.

Atrobe danki na boso tur y Dios bendiciona boso. Awor critica constructivo. Na St.Maarten, mi a sinti orguyoso, ora mi a mira e nomber di e stadion nobo di St.Maarten, mi a sinti orguyoso ora mi a mira e nomber nobo di e stadion di St.Maarten, yama RAOUL ILLIDGE COMPLEX. Loke a ponemi sinti mas orguyoso ainda ta esaki. Raoul ta un mucha, cu a lanta aki na nos dushi isla Aruba, y si mi no ta equivoca, el a traha aki pa sr.Nel Harms o Harms Brothers, prome cu el a bandona Aruba. Mi ta kere, cu el a nace aki tambe. Aruba mester sinti orguyoso, pa mira con leu e nomber di nos hendenan a yega. Dr.Gumbs, como hefe grandi di Sanidad di St.Maarten, y Sr.Raoul Illidge, cu su nomber representando e nomber di un stadion grandi na St.Maarten. E bunitesa di Raoul Illidge Complex ta, cu sr.Raoul Illidge tga na bida ainda. Ta esaki mi tabata predicando tur ora bai na Aruba, pa un hende, sea artista, politico o ken cu sea wordu honra, prome cu e muri bai. Honra e persona mientras tantu e ta na bida. Esey a pasa cu Raoul. Mi ta spera cu nos gobiernu lo sigui e ehempel ey den futuro.

St.Maarten a progresa masha hopi mes. Warda di Polis nobo y moderno, hospital nobo, postkantoor nobo, universidad di St.Maarten nobo, y mucho mas.

Pueblo di Aruba, figurabo cu St.Maarten, Anguila, St.Eustatius, Saba, y un cantidad di otro islanan chikitu, cu ta hopi mas chikitu cu nos, menos hende cu nos, menos placa cu nos y menos desaroyá cu nos, tin Cable TV pa años largo, mientras nos no tin. Awor numan nan ta trahando riba dje. Mi ta haya cu esey ta un gran berguensa. Awor numan nan ta haciendo test, pa Cable TV. Nos ta spera cu esun distritonan, cu ta funcionando ta trahando bon, y nos ta spera cu e prijs, lo no ta uno, cu ta matanos.

St.Maarten ta preparando pa su gran carnaval pronto. Prome cu mi a bai St.Maarten, mi a scucha sr.Jeandor di Asoma, bisando, cu te ainda SAC no a paganan nan placa di carnaval, y si nan no por haya nan placa. Aki casi pa tur cos, bo tin cu pidi limosna. PAKICO/ Nos ta asina pover? Como mi ta papiando di carnaval, pakico SAC y Asoma no por laga pueblo sa, cuanto placa nan a cobra na total pa tur e eventonan carnavalesco? Kico nan tin di sconde? Ta nos placa nan ta cobra.

Na Corsow y St.Maarten e cantantenan di tumba, calypso etc. ta gana bon placa, aki ta co'i loco, un miserable fls.700.--pa e Resnan. Boso mester para y uni, pa sikiera fls.2000.--pasobra SAC ta gana hopi placa. Te otro siman si Dios ke.